

Wabić je rozsudny faktor

Ze zhromadneho zarjadowanja župy „Handrij Zejler“ a Serbskeho sejma

Wojerecy (SN/MiR). Wosobinske dožiwnjenja a nazhonjenja z Wojerec pochadźacych ludźi, dołho w měsće zasydlenych Domowinjanow, staršich kaž tež na polu šulstwa skutkowacych su wčerawšej diskusiji w bróžni Wojerowskeho domu Domowiny wosebity raz spožčili. Dóšlo bě k zarjadowanju na iniciatiwu čłona kubłanskeho wuběrka Serbskeho sejma Měrcina Krawca. Přeprosoył bě na nje nimo Krawca tež župan Domowinskeje župy „Handrij Zejler“ Wojerecy Marcel Brauman. 13 zajimcow je nětko na dwuapołhodžinske zarjadowanje přišlo. Prašenje, na kotrež pytachu wotmołwu, rěkaše: „Budže serbsčina bórže připóznata rěč na gymnazijach a wyšich šulach Sakskeje?“ Położenje we Wojerecach tworješe zakład rozmołwy.

Marcel Brauman hnydom na spočatku rozložil, zo někotružkuli serbsku swójbu z Wojerowskeje kónčiny wottraša swoje dźěćo do Budyšina na Serbski gymnazij slać, dokelž je šulski puć předaloki. Aneta Zahrodkowa so prašeše: „Je serbsčina we Wojerecach dosć připóznata, wosebje tež na wyšich šulach?“ Andreja Rycerjowa, wučerka na Johanneumje, wuswětli, zo maja tam nimo gymnazialneho mjeztym tež 5. lětnik na niwowje wyšeje šule a zo wyšu šulu postupnje wutwarjeja. Wšitcy šulerjo móža tam we wobłuku džěloweho zjednoćenstwa serbsčinu wuknyć. Hladajo na wyšu šulu je to jenički poskitk we Wojerecach. Serbsčinu podawaja w měsće nad Čornym Halštrovom dale na Zakładnej šuli „Handrij Zejler“ a na Lessingowym gymnaziju.

Dr. Andreas Kluge ze Serbskeho sejma rozložil tuchwilne prawniske fundamenty, na kotrež móža so Serbja ze swojimi wosebitymi narokami zložować. Wón rjekny: „Serbska rěč je centralny wobstatk identity a kultury našeho naroda. Mamy prawo na to, sej za zachowanje rěče a kultury adekwatnje wjetšinje wotpowědny kubłanski system žadać.“ Měrcin Krawc skedźbni na wažnosć, wutworić dalše serbskorěčne rupy. „Tajke bychmy měli, bychu-li serbsčinu runje tak kaž francoščinu abo ruščinu na šulach jako cuza rěč z wotpowědnym zakončenjom wuwučowali.“

Doskónčnu wotmołwu na wšelake prašenja w diskusiji njemějachu. „Trjebamy sylne wabjenje w dźěćacych dnjowych přebywaniščach a zakładnych šulach, w kotrychž serbsčinu poskićeja. Jeničce starši rozsudzeja, hač a kak dołho dźěći serbsčinu wuknu. Tuž mamy staršich narěć“, rjekny něhdyša županka Brigita Šramina. Kerstin Zahrodkowa zwurazni: „Dyrbimy sylnišo na wobstejace serbsčinu posredkowace kubłanišća skedźbnjeć, kotrež maja tónle atraktiwny poskitk.“ A Werner Bejma rjekny: „Prawniske předpisy w Sakskej měli so přichodnje potrjebje serbsčinu wuknjacych bóle přiměrić.“ Župan Marcel Brauman namjetowaše, Johanneum při sylnjenju serbskorěčneho poskitka na kubłanišću podpěrać.